

**Nzryr-krbz Pol Kx Ayrnrngr  
Mz Lr Tesalonika  
Natq Ngr Nzaplxtqngr Mz  
Nzryr-krbz Pol Kx Ayrnrngr  
Mz Lr Tesalonika**

Letz lc yrbz aposol Pol mz dzbe lrmakxtr kcng taon kxetu Tesalonika mz provins kc Masedonia. Mzbq ka Masedonia nzrpipebz kandre kc Gris. Oklatile nidr mz nzvzpx-krde krali x yapwxtipxbzle Nrpakxmrlz badr. Kxtrngiulrjiu kxnzkqlung x kzdung lr Jiu nzlxnngitilr Jiszs mzli lc. ☆ A' kzdung lr Jiu kxtrnzrlxnngitiung nzngyati drtwrdr nide x nzbatrpzlr kzdq nzotablrng kxetu. Delc kxnzrlxnngiting tzatwzlrpx-ngrdr Pol badr Timoti x Saelas mz taon kc Berea. Zbz Pol atwzlr-mopwzle Timoti x Saelas mz nzalvztr-krdr lr Tesalonika. Mz nibr kzdung mzli, Pol yrle letz lc mz nzayzlu-krbzle kzdung da kx rlwa-ngrbz Timoti bade.

Yrle letz lc mz mzlir yiz 50—51 AD mz nibr nzrmcngnr mz Jiszs, mzli kc tqmnc-ngrde Korint. Mwx krlc buk ayrnrngr kx nzyr mz Nzryrngrkxtr Kc Ate.

**Mrkeng Mz Letz Lc**

Pol abrtzlvzle nqm q kr lr Tesalonika. [*dckrlzde*  
*1]*

Pol ayzlubzle natq kxnzpibqti-ngrdr nqm q krde. [*2:1-16]*

---

☆ : Aposol 17:1-15

Nike troklati-mou-ngrdeu nidr x nike tqatwzlr-ngrbzle Timoti badr. [2:17—3:13]

Kxnamu nzmnc-zpwx-krdr badr Gct x kzt-edrng. [4:1-12]

Pol ayzlubzle natqdr mz kxnzrlxngiting kcng tzbzpeng x mzli kc nayzlu-mou-ngrm Jiszs. [4:13—5:11]

Alvztr-kzle nidr kxnamu nzmnc-zpwx-lxblr-krdr. [5:12-28]

<sup>1</sup> Ninge Pol, nigr ncdr Saelas x Timoti. Ryrbzkr bamu, nimu leplz neng Gct Trte x Kxetu rgu Jiszs Kxnzmcp, kcng tzmncng taon Tesalonika.

Krka'-ngrgr kx Gct naokatrle nimu mz zmrlz ngrde kxmyalz x namnc-zpwxamu.

### *Nqm q Kr Lr Tesalonika*

<sup>2-3</sup> Mzli kx krka'-ngrbzkr mz Trtegu Gct, awizvz-ngrbzkr bade nimu amrlx. Murde aelwapx-ngrnamu nzrlxngiti-krmu mz nzwztr-krbzmu bade. X aelwapx-ngrnamu nivz lrmu mz nzokatr-krmu leplz. X aelwapx-kz-ngrnamu nzobqtipx-krmu nyzylu-krm Kxetu rgu Jiszs Kxnzmcp. Mz nztu-amqngi-zvz-krmu mz mzli r nzatrkatigr.

<sup>4</sup> Gct mrlztile nimu. X krlzkr kx mcp, le nimu mz nzngini-krmu leplz nedeng. <sup>5</sup> Murde mzli kc lemgr bamu Nrpa ngr Jiszs Kxnzmcp, trpi-txpwzkru mz natq. A' aelwapx-kz-ngrgr mz zmatq, mz nzokatrkr Mqngkxtr, x mz nzrlxngiti-angidrgr. X krlz-kzamu kx aelwapx-ngrgr Nrpakxmrlz lc mz nzmnc-krgr, mzli kc tqmnc-ngrbzkr bamu. Da kcng amrlx tqalebzkr bamu, ngi dalr nzokatrgr nimu. <sup>6</sup> X nigr badr

Kxetu kx ngibz lrpzki bamu kx navz-nqblqamu. Kxmule-esz' sc tzatkatimu, a' sc tqlxngitiamu Nrpakxmrlz mz nzabrtzngr kx vzpxm mz Mqn-grkxtr. <sup>7</sup> Mz nzmukrde lcde, nanginibzmu lrpzki mz leplz neng Kraes mz provins kcng Masedonia x Akaia. <sup>8</sup> Murde nzaetunepx-krmu Nrpa ngr Kxetu Jiszs Kxnmcpix trngi-tpwzu Masedonia x Akaia, a' nrpa ngr nzrlxngiti-krmu nzkrzpe mrlcng kqlu. Dekc, trpnzngr da kx napitr-mopwzkr mz nzrlxngiti-krmu. <sup>9</sup> Lr mztea lcnq tzyapwxtipelr nzmrlzkr nqm q krmu mz nzabrtzlvz-krmu nigr. Se tzyapwxtine nzesakikr nzangio-krmu mqngr drka' kxnlz, kx trpnzngr nzlu-krdr. X tektrpeamu nqm q krmu mz nzwztr-nrbalq-krbzmu mz Yawe Gct angidr kc tqlu alo. <sup>10</sup> X aenzliamu nzvzo-krm Mrlxde Heven, kc tqatulzmlc mz nzbz-krde. Krlc Jiszs kc tqarlapxbzle nigu mz zngya ngr drtwr Gct kc navzm mzli kc napixngr neke tubq x neke vz-rbr.

## 2

### *Nzwzkr Pol Tesalonika*

<sup>1</sup> Mzlegrng x inwegrng, krlzpeamu kx nzvz-krbzkr bamu ngi da kx nrade ycbz. <sup>2</sup> Mzli kc trvzka-ngrpgr bamu, drtqgr etqtx x nzamy-atibz mztea Filipae. Nzmusr-krdr lc nigr krlzamu. Kxmule-esz' nzxplrmimlr bagr nzrpwa'-krdr nzwz-krgr, a' Gct rgr abrmle nelzgr mz nzipix-krbzkr Nrpakxmrlz bamu. <sup>3</sup> Dekc, tqkrlz-ngrnamu kx nzipix-krgr Nrpakxmrlz trvzpx-puu mz drtwr ngr nzipokianger, drtwr kxtrka, x mz drtwr ngr nzesabrtingr. <sup>4</sup> A' pipxkr murde

Gct kc tqabzpx-kaile nigr x aprc-atemle nzwzng  
lc bagr. Trsutiu drtwrgr leplz nzabrtzlvz-krdr  
nigr, a' sutitx drtwrgr Gct kc tqobqplxle nabzgr  
nzabrtzlvz-krde nigr. <sup>5</sup> X krlz-zpwxamu kx tr-  
tamitikru nimu mz nzycmne-krgr x tresabrtikru  
nimu mz nztwz-krgr trau scmu. Krlz Gct kx da  
lc da zpwx. <sup>6</sup> X trsutiu drtwrgr kx naglqlzamu  
nigr o naglqlz kzdung kz leplz nigr. Kxmule-esz'  
nigr aposol neng Kraes, x takitrde nzokatr-krmu  
nigr x nzamatq-krmu nigr, a' trwaipwzkru lc  
bamu. <sup>7</sup> A' mzli kc tqmnc-ngrgu, mnc-nrwxbzkr  
apubzkr bamu lxe doa, kc tqaclvele itoto nede.  
<sup>8</sup> Abrtzlvz-ngrgr nzrpipx-ngrbz bamu Nrpa ngr  
Gct murde aodukr nimu. X abrtz-kzkr nzka-lzbq-  
krbzkr bamu murde pqtr zlwz mz drtwrgr nimu.  
<sup>9</sup> Mzlegrng x inwegrng, krlzx kx sc tqdcpxbe  
mz drtwrmu kxmu nzwz-kato-krgr. Mzli lc  
tqyapwxtipx-ngrbzkr Nrpakxmrlz bamu, wzkr  
mz nrlckxbq x ngrlx mz nzatatr-krmgr trau,  
murde ma tqaetunepxkr nzwz-krmu.

<sup>10</sup> Mzli kc tqmnc-ngrgu, krlz-zpwxamu kx  
nzmnc-krgr tr x tubq, x trpnzng da kx trkatr elr.  
X krlz Gct kx krlc da angidr. <sup>11</sup> Krlz-kzamu kx  
apusr-ngrgr nimu doa negrng. <sup>12</sup> Axplrkr nimu,  
apqtrpzkr drtwrmu, x pibzkr bamu kx nzmnc-  
krmu natubq, murde natakitrde Gct kc tqkqlele  
nimu mz nzmncz-krbzmu bade x mz nzprtr-  
krmu mz nzmyalz-krde.

<sup>13</sup> X awi-zvzbzkr mz Gct. Murde mzli kc lemgr  
bamu Nrpa ngr Kraes, xlamu x lxngitiamu. X  
lxngiti-kzamu kx nrpa lc tqngi natq Gct angidr,  
trngiu natq ncblo. X me tutr-ngrde lape! X natq

Gct lc tqatutrle nzwz-krde mz nabzmu, nimu kcng tzbtripe drtwrmu Jiszs. <sup>14</sup> Mzlegrng x inwegrng, prtramu mz nzatrkatigr kcpwz tzprtrng lr Jiu kcng tzlxngitilr Mevalu Jiszs, tzmncng mz Judiz Provins. Murde lr mrnyzdr nzatrkatilr nidr, da kc tzwaisr-ngrdr lr mrnyzmu nzatrkatikrdr nimu. <sup>15</sup> Lr Jiu lcng, melrmqdrng nznibqkailr profet. X mz nibrdr, trtedrng nznibqkzlr Kxetu rgu Jiszs Kxnmcpx. X mzli ka, sc tzmaszlrpe-kz-ngrdr nigr. Gct trabrtzlvzleu lr Jiu lcng, murde nzpctxpx-ngrdr leplz amrlx, <sup>16</sup> mz nzrpwa'-krmlr bagr nzle-krbzkr nrpa ngr nzarlapxngr mz kxtrngiulrJiu. Mz nzmu-krde lcde, tzrtxlvlz-zvzpelr alwx ngrdr. A' mzli ka zngya ngr drtwr Gct ycpe pipz nzklz-krbzle nidr.

### *Suti Drtwr Pol Naoklati-mouleng*

<sup>17</sup> Mzlegrng x inwegrng, mzli kc tqmncitix-trpemgr mzli mrbcnepwz mz nrkrdrdq, sutitx zlvz drtwrgr nzoklati-kr-mopwzkr nimu, a' sc tqrbxlm bagr. Kxmule-esz', a' krlzku kx mz drtwrgr nigu kc tqmncu. <sup>18</sup> Sutitx zlvz drtwrgr nyzlu-krbzkr bamu. X ninge, Pol, abz-ngrnele nzwrde kqlupe, a' Setzn tqrpwa'-ngrde nzvz-krbzkr. <sup>19</sup> Suti drtwrgr nzoklati-mou-krmgr nimu murde obqtipxkr nzmc-krgr nztu-amqngikrmu mz nzrlxngitingr. Mz nzmu-krde lcde, sa nanginimu kx nabatrpzle nzaelalz-krm drtwrgr! X sa na-apuamu da kxmrlz kx natwzkr mz nzwz-krgr. X sa naglqpx-lzbq-ngrgr nimu mzli kc natu-lxblr-ngrbzku mz mz Jiszs Kxnmcpx mzli kc nayzlu-mou-ngrmle!

<sup>20</sup> Da zpwxtx! Nimu kx nabatrpzle nzalalz-krm drtwrgr x nimu kx nzglqlzng nigr.

### 3

<sup>1</sup> Mzli kc tqrblytxpe nzaenzli-krgr x tqxngitr-zlwzkr nzmnc-rlru-krmamu bagr, sc tqao tipe drtwrgr kx nigr badr Saelas namnc-tpwzkr taon kc etu Atens, <sup>2-3</sup> x na-atwzlr-ngrbzkcr Timoti bamu. Nide mzlegr kx wzkr badr mz nzwztr-krbzkcr Gct. Okatrlc nigr mz nzyapwxtipx-krbzle Nrpa ngr Kraes. X atwzlr-ngrbzkcr nide murde na-axplrle nimu x na-apqtrpzle nabzmu. Murde ma nzrlxngiti-krmu tqrnrc mz nzcxpungcr kcng tqprtzmqng bamu mzli ka. Murde krlzpeamu kx da kxmule lcng naprtzmqng bagu. <sup>4</sup> Murde pi-pnzbkcr ena bamu mzli kc tqmnc-ngrgu, kx leplz sa na-atrkatilr nimu kalr. X mzli ka da kc tqpi-ngrbzkcrle sc tqtutrpe. <sup>5</sup> Mz nzm-krde lcde, mzli ka rblxtxpe nzaenzli-krgr, delc tqatwzlrpe-kai-ngrbo Timoti bamu, murde nakrlzx kxmupe nzrlxngiti-krmu. X mwxlrlvzx nimu murde ma tqataole nimu Setzn, x nzwz-krgr sc tqngipe brmrda.

<sup>6</sup> A' mzli ka Timoti yzlupe-mop bagr x lemle bagr nrpa ngr nzrlxngiti-krmu x nivz lrmu. Pimle bagr kx dcpz zvz mz drtwrmu nigr x sutitx zlwz drtwrmu nzm-c-krmu nigr, da kc tqwai-kzkr nzsutikr drtwrgr nzm-c-krgr nimu. <sup>7</sup> Mz nzm-krde lcde, kxmule-esz' nzatrkatilr nigr mz da kxkqlu, a' apqtrle drtwrgr nzxlr-krgr nrpa ngr nzrlxngiti-krmu. <sup>8</sup> X mnc-zpwxpekr mz nzxlr-krgr nzlolvz-amqngi-krmu Kxetu rgu. <sup>9</sup> X rblxm bagr nzipix-krgr natq ngr nzawi-krbzkcr

mz Gct mz nzetukr nzabrtzlvz-krgr nimu. <sup>10</sup> X nzkрка'-krgr pq zvz, ngrlx x nrłckxbq. Krka'-ngrgr kx namc-moukr nimu x na-alvztr-ngrbzkr bamu da amrlx kcng tqmrbrpxm mz nzrkrlz-krmu nzrlxngiti-krgr.

<sup>11</sup> Krka'ngr mz nzrpi-krgr kx,

“Gct Trtegr x Kxetu rgr Jiszs, rlxtibzkr bamu naoliqtipxbzmu lrpzki kc nakrlz-ngrbzkr lr Tesalonika. <sup>12</sup> X krka'-kz-ngrgr kx na-aetunepxbzmu nivz lrdz mz nzmrlzti-lzbq-krdr x nzmrlzti-krdr leplz amrlx, x namrlztilr leplz da kc tqwai nzmrlzti-krgr nidr. <sup>13</sup> Trte, axplr nabzdr, murde natrng x natubqng mz nzobq-krm, myapxbz mzli kc Kxetu rgr Jiszs nayzlu-ngrmlr badr leplz kxnztr nedeng. Eu. Angida!”

## 4

### *Nzmncngr Kx Abrtzlvz Gct*

<sup>1</sup> Mzlegrng x inwegrng, alvztrpekr nimu mz nzmncngr kxtubq, murde na-aelalz-ngrm drtwr Gct, x sc tqvz-nqblqpeamu. X mzli ka rngidrtx-zlvz-ngrbzkr bamu mz zmatq ngr Kxetu rgu Jiszs, kx nzmnc-krmu lc tqubq navz zvz x naetunepx. <sup>2</sup> Krlzpeamu nike pibzkr bamu, mz zmatq ngr Kxetu rgu Jiszs. <sup>3</sup> Me pnz drtwr Gct nide sele: Nzmnc-krmu natramu, x nayrlqpx-lzbqamu mz alwx ngr nzrmwimi-krmu doa kx-trngiu krnalzmu. <sup>4</sup> Suti drtwrde kx doa kxes' mz nimu nakrlzle nzaclve-krde nrkrdrdqde mz nzmncngr kxtr x kxtubq. <sup>5</sup> Leplz kcng trnzkrzlru Gct nzrlrpx-ngrdr nrkrdrdqdr nzmailz-krdr nidr mz alwx ngr nzrmwimingr doa kxtrngiu krnalzdr.

A' bzkq apuamu nidr. <sup>6</sup> X bzkq angqngutiamu kztemu mz da lc. Murde Gct sa na-ayrplapx-zlwzle leplz kx nztrngztibzlr da lcng. Dekc tqpi-ngrbzkrlc ena bamu mz natq kxlqlwx. <sup>7</sup> Gct kqlele nigu murde nzmnc-krqu natr. X trsutiu drtwrde nztrngzti-krbzku alwx ngr nzmwim-ingr kxtrngiu krnalzgu. <sup>8</sup> Mz nzm-krde lcde, mrlx kx pxtxpx-ngrde nzalvztrngr lc, pxtxpx-kz-ngrde Gct, kc tqrkam bagu Mqngrkxtr.

<sup>9</sup> Tryrpwzkru kxnamu nzmrlzti-krmu kztemung mz Kraes, murde opx angidr kx Gct alvztrpe-ngrde nimu da lc. <sup>10</sup> Murde mrlztiamu leplz neng Kraes mz mztea amrlx mrkc Masedonia Provins. A' mzli ka, rngidrtr-ngrbzkrlc bamu kx nzmrlzti-krmu nidr naetunepx zvx. <sup>11</sup> Rtrngztibzmu da kc tqbatrpzle nzmnc-krmu mz nrwx. Bzkq pnz drtwrmu dztu leplz, a' dztumu. X aleamu nzwx-krmu esz'-krmu. Pi-pnzbzkrlc bamu ena nzale-krmu da lcng. <sup>12</sup> Murde mz nzmnc-krmu lc tqmrlz, leplz kcng trnzlxngitilru Kraes na-amatqlr nimu x ma tqmnc-xgleamu doa kc-kzng.

### *Nyzlu-krm Kxetu Rgu*

<sup>13</sup> Suti drtwrgr nakrlzamu nike naprtzbx mz leplz neng Kraes kcng tzbzpeng. Murde trsutiu drtwrgr nzmnc-krmu mz drtwr kxvx mz nzapu-krmu leplz kx trpnzngr da kx nzobqtipxlr. <sup>14</sup> Lxngitiku kx Jiszs bz x tulz mou. Mz nzm-krde lcde, Gct sa na-atulz-kzple krkcng tzbzpeng tzlxngitilr Jiszs, murde navzmimle nidr, mzli kc nayzlu-ngrmle.



<sup>15</sup> Nzalvztrkr Kxetu nide sele. Nigu kcng tzlubeng mzli kc nayzlu-ngrm Kxetu rgu, trnart-wayzpwzkuu mz krkcng tzbzpeng, mz nzvzdz-ngrbz mz nzmctingr nide. <sup>16</sup> Murde mzli kc Kxetu rgu navzom Heven, lr nrlc sa naxlrlr dq nzkabongr, natq narenjrl, x trpu r nzkqkr Gct. X leplz neng Kraes kx nzbzpeng natulz-kaipqng. <sup>17</sup> X mz nibrde, nigu kcng tzlubeng x kxnzlu-moung sa navzdz-lxblrku mz nabz dcbz, mz nzyrlwrpx-lxblr-rgu badr Kxetu mrlc mzlixl. X sa namnc-lxblr-aloku badr Kxetu! ✧  
<sup>18</sup> Mz nzm-krde lcde, apqtr-etramu nabzmu mz nzipx-krmu natq lcng.

## 5

### *Naoliqti-zvzku Nyzlu-krm Kxetu*

<sup>1</sup> Mzlegrng, mzli ka trnayrpwzkru bamu mz mzli kc na-adcpx-lzbq-ngrm Kxetu rgu o zbq kc nayzlu-ngrmle. <sup>2</sup> Murde krlzpeamu kx mzli lc naktipx, na-apule ncblo kc tqna da mz nrlckxbq. <sup>3</sup> Lepz kx trnzrlxngitiung narpilr kx, "Nigr ka tqmnc-zpwxpekr ye mz nrw." A' mzli lcde, nzayrplapxngr nidr sa na-ani txpwz, na-apule nimz ngr zvetqkr nibr olvz kx narmika. X sa narblxbz mz leplz lcng nzrlapx-krdr mz nzlva-krdr. <sup>4</sup> A' trnaktipxwamuu nzvz-krm Mzli lc Tqmatq, mz nzapu-krde nzvz-krm ncblo kc tqna da. Murde trvz-nqblqpewamuu nqm qngr alwx. <sup>5</sup> A' nimu doa neng Kraes kcng tqvz-nqblqamu nzalvztrngr angidrng x aleamu da kxtubq. A' tralepekuu da kx amyale drtq

---

✧ **4:17** Luk 17:34-36

kcng tqyc-kapq. <sup>6</sup> Bzkq apuku kxtrnzrlxngitiung. Murde alwx ngrdrng nzakamrbr-ngrdr da mz nabzdr x nzapulr leplz kx nzmwing, murde trnzkrzlzru drtwr ngr da kx prtilzmqng mzli ka mz nrlc. Mz nzmukrde lcde, na-aclvetio-lzbqku x nalolvzo-lzbqku. <sup>7</sup> Murde nrlckxbq mzli r alwx, mzli r nzmwingr, x mzli r nzrnmqngr. <sup>8</sup> Mz nzvz-nqblq-krqu nzalvztrngr angidr, na-aclvetio-lzbqku. Na-apuku ncblo ngr vea mz nzvec-krqu badr Setzn. Nzrlxngiti-krqu x nivz lrgu na-ayrbqpxle nabzgu na-apule temz ngr lomrgu kc tqyrputrngr nipna. X nzarlapxkr Kraes nigu na-ayrbqpxle drtwrgu na-apule da kxmqngi kx nalalvzle nar ncblo ngr vea, murde mz drtwrgu kxbr, obqtipxku da amrlx kx vzpxm mz nzarlapx-krde nigu. <sup>9</sup> X nadcp x mz drtwrgu kx Gct mcp xle nigu x arlapxpele nigu mz nzbzkr Kxetu rgu Jiszsz Kxnmcp x. A' trmcp xle nigu mz nzayrplap x-alo-krde nigu. <sup>10</sup> Kxmule-esz' bzpeku o lubeku mzli kc nayzlu-ngrm Jiszsz, a' bz-ngrde murde nalu-zvzku badr. <sup>11</sup> Mz nzmukrde lcde, apqtramu drtwrmu x axplr-lzbqamu da kc tqwaiamu mzli ka.

### *Natq Ngr Nzarl-lzbqngr*

<sup>12</sup> Mzli ka, mzlegrng x inwegrng, na-amatqamu krkcng tzwz-katong mz mzlirmu, mz nzaclve-krdr nimu mz zmatq ngr Kxetu x mz nzalvztr-krdr nimu. <sup>13</sup> Mz nivz angidr, aelwa-ngrbzmu badr kx amatqamu nidr mz nzwzngkr kcng tzale-bzlr bamu. X mnc-zpwx-lxblramu.

<sup>14</sup> Mzlegrng x inwegrng, lalztqmamu bagr. Axplrbzmu natqmu mz krkcng drtqdr tqsa.

Apqtrpzmu drtwr krkcng tzmwxlrng. Okatramu krkcng nabzdr tqbao mz nzlxngiti-krdr. X mnc-zpwxamu badr leplz amrlx. <sup>15</sup> Aclvetio-lzbqamu x bzkq ayzclubzmu da kxtrka mz da kxtrka. A' na-alebzmu da kxmrlz mz kztemung x leplz amrlx.

<sup>16</sup> Naelalz-zvz-ngrm drtwrmu! <sup>17</sup> Nakrka'-zvzamu! <sup>18</sup> Kxmule-esz' nike prtz, a' na-awi-zvz-ngrbzmu mz Gct da lc. Murde suti drtwrde kx doa amrlx kcng tzlxngitilr Jiszs na-awi-zvzbzng bade.

<sup>19</sup> Bzkq rpwa'-ngrnamu nzwzkr Mqngrkxtr. <sup>20</sup> Bzkq apusr-ngnamu natq x nrpa kc tqaelwapx-ngrbz Mqngrkxtr mz leplz brmrda. <sup>21</sup> A' mzli kc tqrpingr kzdq ncblo kx natqde aelwa-ngrbz Mqngrkxtr, naobqtitr-kaiamu da amrlx. X yrlq-zvzamu natq kxmrlz. <sup>22</sup> A' yrlqpx-lzbqamu mz natq kxtrka amrlx.

<sup>23</sup> Nzkrka'-krgr nimu nide sele:

“Gct, nim kc tqrkam bagr nzmnc-zpwxngr. Krka'-ngrgr kx na-atrq nidr mz da amrlx. Murde nztubq-krdr mz mqngrdr, nabzdr, x nrkrdrtdr navz nakrlzbzle nyzylu-krm Kxetu rgr Jiszs Kxnzmcpx. <sup>24</sup> Nim kc tqkqlepele nidr. X lxngitigr kx sa na-atutrq natqmqng amrlx. Eu. Angida!”

<sup>25</sup> Mzlegrng x inwegrng, nakrka'-kz-ngnamu nigr. <sup>26</sup> Pibz “Nimu la,” mz inwegung x mzlegung amrlx mrla, mz nzmale-lxblr-krmu mqmu mz nivz. <sup>27</sup> Rngidrtx-zlwz-ngrbo bamu mz zmatq ngr Kxetu, kx natqgr lcng narlwxbz mz leplz neng Kraes amrlx.

<sup>28</sup> Krka'-ngrgr kx Kxetu rgu Jiszs Kxnzmcpx naokatrle nimu mz zmrlz ngrde kxmyalz.

Delape. Ninge *Pol*,

1 Tesalonika 5:28

xii

1 Tesalonika 5:28

nigr ncdr *Saelas x Timoti.*

**Nzryrngrkxtr Kc Ate Rut x Sam  
The New Testament plus Ruth and Psalms is the  
Natügu language of the Solomon Islands  
Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f